



Broj: 01-45-1782-7/26

Sarajevo, 30.07.2026. godine

Na osnovu , člana 30. Statuta KJKP "POKOP"d.o.o. Sarajevo i člana 18. Poslovnika o radu Nadzornog odbora na sjednici održanoj 30.07.2026. godine Nadzorni odbor donosi

ODLUKU

o usvajanju Pravilnika o dodjeli napuštenih i rezervaciji slobodnih grobnih mjesta

Član I

Usvaja se Pravilnik o o dodjeli napuštenih i rezervaciji slobodnih grobnih mjesta

Član II

Odluka stupa na snagu danom donošenja - 30.07.2026. godine.

Član III

Za ažuriranje ovog Pravilnika nadležna je Služba za evidentiranje, naplatu i rezervaciju grobnih mjesta, a izmjene i dopune usvaja Uprava KJKP "POKOP" d.o.o. Sarajevo.

Obrazloženje

Na sjednici Nadzornog odbora održane dana 30.07.2026. godine a po prijedlogu Uprave preduzeća, Služboe za evidentiranje, naplatu i rezervaciju grobnih mjesta, Nadzorni odbor usvaja Pravilnik o radu ove radne jedinice. Pravilnik je usvojen u cilju preciziranja uslova za dodjelu grobnih mjesta koja su proglašena napuštenim i rezervaciju slobodnih grobnih mjesta gdje se omogućava zadržavanje grobnog mjesta srođnicima i zakonskim nasljednicima uz plaćanje usluge obnavljanja prava korištenja grobnog mjesta koje je proglašeno napuštenim.


Definišu se uslovi izuzimanja posmrtnih ostataka iz zajedničke grobnice/kosturnice, koji podrazumjevaju prethodno obezbjeđeno grobno mjesto i plaćanje troškova izuzimanja.

Dostaviti:

- Nadležne službe i radne jedinice
- a/a

PREDSJEDNIK
NADZORNOG ODBORA

Mirza Alija



KANTONALNO JAVNO KOMUNALNO PREDUZEĆE
"POKOP" D.O.O. SARAJEVO



ZA SAHRANE I UPRAVLJANJE GROBLJEM
FUNERALS AND CEMETERIES MANAGEMENT

Mula Mustafe Bašeskije 38, Sarajevo - BiH
Telefon: +387 33 535 170; Fax: +387 33 535 164

BESPLATNI TELEFON: 080 02 02 68
kjkp.pokop@bih.net.ba - www.pokop.ba

PRAVILNIK

KJKP "POKOP" D.O.O. SARAJEVO

O DODJELI NAPUŠTENIH I REZERVACIJI SLOBODNIH GROBNIH MJESTA

Sarajevo, Juli 2026. godine



ID BROJ - 4200119040004; PDV BROJ - 200119040004; MBS - 65-01-0701-13; SUDSKI REG. BROJ - 065-0-Reg-08-002972
Transakcijski računi: UniCredit Bank - 3283202250686353; RAIFFEISEN Bank - 1610000005140041
UNION Banka - 1020290000015965; IBAN CODE - BA39338304838543037; SWIFT - UNCRBA22  **080 02 02 68**

Na osnovu čl. 8. i 19. Zakona o javnim preduzećima u Federaciji Bosne i Hercegovine („Službene novine Federacije BiH“, br. 8/05, 81/08, 22/09 i 109/12), te člana 30. Statuta Kantonalnog javnog komunalnog preduzeća za sahrane i upravljanje grobljem „POKOP“ d.o.o. Sarajevo, a u skladu sa čl. 32., 33., 34., 35. i 35 a. Odluke o uređivanju i održavanju gradskih grobalja („Službene novine grada Sarajeva“ br. 27/84, 14/85 i 13/90) Nadzorni odbor na svojoj sjednici održanoj 30.07.2026. godine, donosi:

PRAVILNIK **o dodjeli napuštenih i rezervaciji slobodnih grobnih mjesta**

I. OPĆE ODREDBE

Član 1.

Pravilnikom Kantonalnog Javnog Komunalnog Preduzeća „POKOP“ d.o.o. Sarajevo za sahrane i upravljanje grobljem (u daljem tekstu: Preduzeće) o dodjeli napuštenih i rezervaciji slobodnih grobnih mjesta (u daljem tekstu: Pravilnik) uređuje se:

- I. Opće odredbe,
- II. Osnovni pojmovi,
- III. Raspolaganje napuštenim grobnim mjestom,
- IV. Raspolaganje slobodnim grobnim mjestom,
- V. Naknada za korištenje grobnog mjesta koje je proglašeno napuštenim i naknada za dodjelu slobodnog grobnog mjesta

II. OSNOVNI POJMOVI

Član 2.

(Osnovni pojmovi)

- (1) **Napušteno grobno mjesto** u smislu ovog Pravilnika je grobno mjesto ili grobnica koje se deset godine uzastopno uredno ne održava ili za koje se deset godina uzastopno ne plaća naknada za korištenje grobnog mjesta. Ukoliko se ispune bilo koji od ova dva uslova grobno mjesto se smatra napuštenim.
- (2) **Grobno mjesto proglašeno napuštenim** je grobno mjesto za koje je, nakon provedene procedure oglašavanja u skladu sa Odlukom o uređivanju i održavanju gradskih grobalja, Direktor preduzeća je donio rješenje o proglašavanju napuštenim.
- (3) **Slobodno grobno mjesto** je novo grobno mjesto nastalo uređenjem zemljišta za tu namjenu i napušteno grobno mjesto koje je u skladu sa Odlukom o uređivanju i održavanju gradskih grobalja proglašeno napuštenim i grobno mjesto iz kojeg je na pisani zahtjev bliskih srodnika izvršena ekshumacija posmrtnih ostataka. Slobodnim grobnim mjestima raspolaže Preduzeće.
- (4) **Naknada za korištenje grobnog mjesta** je godišnja novčana naknada koja se plaća KJKP „POKOP“ d.o.o. Sarajevo u iznosu koji utvrđuje Skupština Kantona Sarajevo.
- (5) **Uređivanje i održavanje grobnog mjesta** u smislu ovog Pravilnika podrazumijeva održavanje rubnog travnjaka, sasijecanje trave, održavanje zasađenog cvijeća i ukrasnih grmova, uklanjanje suhih biljnih i drugih otpada, održavanje nadgrobnih spomenika i oznaka, posuda za cvijeće i svijećnjaka, privremenih ograda od dekorativnih lanaca i održavanje neposrednog prostora oko grobnog mjesta. Uređivanje i održavanje nadgrobnih spomenika i grobnica sastoji se u održavanju kamenih i betonskih dijelova spomenika i grobnica, ispravljanju iskošenih - uleglih spomenika i grobnica, održavanju natpisa, slika i drugih obilježja na spomeniku i grobnici, održavanju čistoće spomenika i grobnica, kaseta, kolumbarija za urnu sa pepelom umrlag, održavanje staza oko spomenika i grobnica. Uređivanje i održavanje grobnih mjesta, nadgrobnih spomenika i grobnica dužni su vršiti srodnici i druga zainteresovana lica.
- (6) **Bliskim srodnicima** u smislu ovog Pravilnika smatraju se bračni drug, srodnici u prvom nasljednom redu, braća i sestre, bračni drugovi braće i sestara.
- (7) **Glavna knjiga ukopa** (u daljem tekstu: GKU) je knjiga u koju Služba za evidentiranje, rezervacije i naplatu unosi sve aktivnosti i relevantne činjenice za svako pojedinačno grobno mjesto na grobljima kojima upravlja i gazduje Preduzeće.

III. RASPOLAGANJE NAPUŠTENIM GROBNIM MJESTOM

Član 3.

(Proglašavanje grobnog mjesta napuštenim)

- (1) Služba za evidentiranje, rezervacije i naplatu grobnih mjesta dužna je voditi ažurnu evidenciju o svim grobnim mjestima, plaćenim naknadama za korištenje grobnog mjesta, održavanju grobnih mjesta, te blagovremeno obavijestiti Upravu Preduzeća o grobnim mjestima koja ispunjavaju uslove za proglašenje napuštenim.
- (2) Na osnovu obavijesti Službe za evidentiranje, rezervacije i naplatu grobnih mjesta Uprava Preduzeća u Službenim novinama BiH i jednom od dnevnih listova objavljuje saopštenje kojim poziva zainteresirana lica da izmire naknadu za korištenje grobnih mjesta (iskorištenih i rezervisanih) i obavještava o namjeri ekshumacije posmrtnih ostataka ukoliko se dugovanje ne izmiri.
- (3) Po isteku 2 (dva) mjeseca od dana oglašavanja saopštenja u Službenim novinama i dnevnom listu Direktor Preduzeća, ovlašteni član Uprave ili drugi radnik po ovlaštenju Direktora donosi rješenje o proglašavanju grobnog mjesta napuštenim.
- (4) Kad završi pokopavanje u zajedničko grobno mjesto odnosno grobnicu pozvaće se srodnici na način iz stava 2. ovog člana, da u roku od 30 dana preuzmu nadgrobne spomenike i ostale predmete od vrijednosti.

Član 4.

(Dodjela grobnog mjesta koje je proglašeno napuštenim)

- (1) Grobno mjesto koje je proglašeno napuštenim, ali nije izvršena ekshumacija, kao i grobno mjesto koje je rezervisano, ali nije ustupljeno za novu rezervaciju, može se dodijeliti na korištenje bliskim srodnicima ili zakonskim nasljednicima.
- (2) Za dodjelu napuštenog grobnog mjesta lica iz stava (1) ovog člana, Preduzeću podnose pisani zahtjev. U zahtjevu je bitno navesti osnovne podatke podnosioca, rodbinsko svojstvo i dokumentaciju kojom dokazuje rodbinsko svojstvo, podatke o groblju i grobnom mjestu za koje se podnosi zahtjev.
- (3) Za rješavanje po zahtjevu iz stava (1) ovog člana primjenjuju se odredbe ovog Pravilnika koje uređuju rad Komisije za procjenu zahtjeva.
- (4) Na prijedlog Komisije iz prethodnog stava Direktor preduzeća, ovlašteni član Uprave ili drugi radnik po ovlaštenju Direktora Preduzeća donosi odgovarajuće Rješenje.
- (5) Prilikom preuzimanja Rješenja o obnovi prava korištenja grobnog mjesta, nosilac Rješenja je obavezan izvršiti uplatu **obnove prava korištenja grobnog mjesta** po važećem cjenovniku, te potpisati ugovor o korištenju grobnog mjesta.

Član 5.

(Grobna mjesta koja se ne mogu proglasiti napuštenim)

- (1) Grobovi koji su proglašeni spomenicima kulture ne mogu se proglasiti napuštenim.
- (2) Grobovi i grobnice u kojima su pokopani posmrtni ostaci značajnih historijskih ličnosti, ne mogu se proglasiti napuštenim.

IV. RASPOLAGANJE SLOBODNIM GROBNIM MJESTIMA

Član 6.

(Raspodaganje slobodnim grobnim mjestom)

- (1) Preduzeće raspolaže slobodnim grobnim mjestima.
- (2) Slobodno grobno mjesto se može dodijeliti na korištenje po potrebi i po zahtjevu.
- (3) Služba za evidentiranje, rezervacije i naplatu grobnih mjesta dužna je voditi evidenciju o slobodnim grobnim mjestima, kao i načinu njihovog nastanka.

Član 7.

(Slobodna grobna mjesta nastala ekshumiranjem posmrtnih ostataka iz grobnih mjesta koja su proglašena napuštenim)

Grobno mjesto koje se proglasi napuštenim postaje slobodno grobno mjesto premještanjem posmrtnih ostataka. Posmrtni ostaci se premještaju u zajedničku grobnicu - kosturnicu u limenom sanduku koji na sebi ima trajno upisane sljedeće podatke:

- ime i prezime ukopane osobe,
- datum ili godina ukopa,
- datum premještanja iz grobnog mjesta u zajedničku grobnicu – kosturnicu,
- oznaka grobnog mjesta (grobje, parcela, red i broj) iz kojeg se premještaju posmrtni ostaci

- oznaka u zajedničkoj grobnici – kosturnici.

Član 8.

(Dodjela grobnog mjesta na korištenje po potrebi)

- (1) Kada nastupi smrt, a stranka ne želi grobno mjesto koje je predviđeno za redovan ukop, Direktor Preduzeća, ovlašteni član Uprave ili drugi radnik po ovlaštenju Direktora Preduzeća može dodijeliti grobno mjesto koje je proglašeno napuštenim, pod uslovom da zainteresirana stranka podnese zahtjev za rezervaciju.
- (2) Direktor Preduzeća na osnovu Prijedloga Komisije donosi rješenje o odobravanju rezervacije i rješenje se izdaje na neodređeno vrijeme.
- (3) Pored troškova ukopa za dodijeljeno grobno mjesto, plaća se jednokratna naknada za rezervaciju grobnog mjesta po utvrđenom cjenovniku.
- (4) Direktor Preduzeća na osnovu Prijedloga Komisije, ukoliko postoji realna mogućnost, donosi i rješenje o eventualnoj zamjeni grobnog mjesta prema pismenom zahtjevu stranke.

Član 9.

(Zahtjev za rezervaciju slobodnog grobnog mjesta)

- (1) Za rezervaciju slobodnog grobnog mjesta zainteresovana strana podnosi pismeni zahtjev Preduzeću u Službi za naplatu, evidentiranje i rezervaciju grobnih mjesta. U zahtjevu se obavezno navode osnovni podaci podnosioca i naziv groblja na kojem se nalazi grobno mjesto.
- (2) Podnosilac zahtjeva za rezervaciju grobnog mjesta može upisati i lica koja imaju pravo ukopa u rezervisano grobno mjesto.
- (3) Zahtjev za rezervaciju grobnog mjesta se podnosi u formi koja je propisana u prilogu broj 2, a koji čini sastavni dio ovog Pravilnika.

Član 10.

(Komisija za procjenu zahtjeva)

- (1) Služba za naplatu, evidentiranje i rezervaciju grobnih mjesta dužna je zaprimiti podneseni zahtjev i proslijediti ga komisiji za procjenu opravdanosti zahtjeva za rezervaciju grobnih mjesta (u daljem tekstu: Komisija).
- (2) Komisiju za rješavanje zahtjeva za rezervaciju grobnih mjesta formira Direktor Preduzeća.

Član 11.

(Sastav komisije)

- (1) Komisija se sastoji od tri (3) člana.
- (2) U komisiju za rješavanje zahtjeva obavezno se imenuju dva zaposlenika Službe za evidentiranje, rezervacije i naplatu grobnih mjesta i Upravnik ili Zamjenik upravnika groblja na kojem se nalazi grobno mjesto za koji se podnosi zahtjev.

Član 12.

(Rješavanje po zahtjevu)

- (1) Zahtjev za rezervaciju grobnog mjesta na korištenje rješava Direktor Preduzeća, ovlašteni član Uprave ili drugi radnik po ovlaštenju Direktora, a na osnovu Prijedloga Komisije.
- (2) Komisija analizira svaki zaprimljeni zahtjev, utvrđuje činjenice, potvrđuje navode iz zahtjeva i provjerava dostavljene dokumente.
- (3) Na osnovu utvrđenih činjenica i navoda Komisija predlaže Direktor preduzeća da odobri ili da odbije zahtjev za rezervaciju.
- (4) Direktor Preduzeća na osnovu Prijedloga Komisije donosi rješenje o odobravanju rezervacije slobodnog grobnog mjesta, rješenje se izdaje na neodređeno vrijeme pod uslovom da osoba na koju glasi rješenje plati jednokratnu naknadu za rezervaciju grobnog mjesta i preuzme obavezu plaćanja naknade za korištenje grobnog mjesta i urednog održavanja grobnog mjesta.

Član 13.

(Rok za dostavu prijedloga)

- (1) Prijedlog za odobrenje, odbijanje zahtjeva ili informaciju o nedostatku raspoloživih grobnih mjesta, Komisija je dužna dostaviti Direktor ili članu Uprave po njegovom ovlaštenju u skladu sa raspoloživim grobnim mjestima.

- (2) Direktor ili član Uprave po njegovom ovlaštenju je dužan razmotriti zahtjevi donijeti odluku u skladu sa prijedlogom Komisije u roku od trideset (30) dana od dana zaprimanja Prijedloga.
- (3) Zahtjeve kojima se ne može udovoljiti u navedenom roku zbog nedostatka raspoloživih mjesta komisija evidentira i razmatra u narednom periodu, uz obavezu obavještanja podnosioca zahtjeva, u roku od trideset (30) dana od dana zaprimanja zahtjeva, da će se po njihovom zahtjevu odlučivati u narednom periodu o načinu rješavanja.

Član 14.

(Obavezan sadržaj i forma prijedloga)

- (1) Prijedlog Komisije je obavezan u formi koja je propisana u prilogu broj 3, a koja je sastavni dio ovog Pravilnika.

Član 15.

(Pravo žalbe)

- (1) Protiv rješenja, dozvoljena je žalba u roku od 15 dana od dana zaprimljenog rješenja.
- (2) Žalba se podnosi Upravi Preduzeća.

Član 16.

(Obavezna vođenja evidencije)

- (1) Služba za evidentiranje, rezervacije i naplatu grobnih mjesta je dužna izvršiti upis promjene podataka o korisnicima po pozitivno riješenim zahtjevima za određeno grobno mjesto u GKU.
- (2) Služba za evidentiranje, rezervacije i naplatu grobnih mjesta je dužna evidentirati sve pristigle zahtjeve za određeno grobno mjesto.
- (3) Preuzimanjem rješenja o odobravanju rezervacije i plaćanjem jednokratne naknade vrši se upis u GKU, a status grobnog mjesta se mijenja u rezervisano.

V. NAKNADA ZA KORIŠTENJE NAPUŠTENOG I REZERVACIJU SLOBODNOG GROBNOG MJESTA

Član 17.

(Naknada za korištenje napuštenog rezervaciju slobodnog grobnog mjesta)

- (1) Za korištenje napuštenog i rezervaciju slobodnog mjesta podnosioc zahtjeva je dužan platiti naknadu.
- (2) Naknadu iz stava (1) ovog člana utvrđuje Nadzorni odbor.

Član 18.

(Izmjene i dopune)

Izmjene i dopune ovog Pravilnika vrše se na način predviđen za njegovo donošenje.

Član 19.

(Stupanje na snagu)

Ovaj Pravilnik stupa na snagu osmog dana od dana njegovog objavljivanja na oglasnoj ploči i web stranici Preduzeća. Stupanjem na snagu ovog Pravilnika prestaje da važi Pravilnik o dodjeli napuštenih i rezervaciji slobodnih grobnih mjesta broj: 02-45-2510-3.1/25 od 03.11.2025. godine.

Broj:01-45-1782-7.1/26

Sarajevo, 30.07.2026. godine

Potvrđena zakonitost pravilnika od kvalifikovanog lica
pravne struke (čl. 19. ZJP FBiH)

PREDSJEDNIK
NADZORNOG ODBORA

